

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara:

**Naalakkersuisunut apeqquut:**

- 1. Erngup nukinganik nukissiorfiit pioreersut, nukik pilersinneqartoq ataatsimut katillugu qanoq angitigisoq atunngittoortarpaat ?**
- 2. Erngup nukinganik nukissiuutit nukik pilersittagaat tamakkiisumik atorluarneqarsimanngippat, Naalakkersuisut nukimmik atorluaanissaq siunertaralugu qanoq pilersaaruteqarpata ?**
- 3. Ilulissani kallerup inniliorfitoqarsuaq 1950-ikkunnili sanaajusimasooq maanna sumut atorpa ?**
- 4. Illoqarfinni eqqakkanut ikuallaasarfiliniit, kiak qanoq annertutigisoq Nukissiorfinnut kommuniniit tunineqartarpa ?**
- 5. Sermersuup kommuniani, Nuup illoqarfiani eqqakkanik immikkoortiterisalernissamik pilersaarutaanut nutaamut Namminersorlutik Oqartussat suleqataarusuppaat ?**

(Inatsisartunut ilaasortaq, Anthon Frederiksen, Partii Naleraq)

**Tunngavilersuut:**

Illoqarfinni erngup nukinganik nukissiuuteqarfiusunik, nukimmik pilersinneqartumik atorluaanissaq assorujussuaq soqutiginarpoq, tassami uggornassaqaq, erngup nukinganik nukissiuutit, nukik pilersittagaat tamakkiisumik atorluarneqanngippat ?

Naluneqanngitsutut Ilulissat avannaani Paakitsumik erngup nukinganik nukissiummik pilersitsisoqarnikuuvoq, taassumalu saniatigut, Nukissiorfik olie-mik ikummatilik aamma atorneqarluni. Nukissiorfitoqarsuaq 1950-ikkunnili pilersinneqarsimasooq maanna

takussunarluni illoqarfiup qiterpasissortaani inissisimavoq. Taanna isaterneqassanersoq imaluunniit qanoq pilersaaruteqarfigineqarnersoq innuttaasut ilaanniit uparuaqqajaaneqartarpoq. Taamaammat taassuma qanoq pilersaaruteqarfigineqarnera paaserusunnarpoq ?

Illoqarfinni eqqakkanut ikuallaasarfilinni kiaap pilersinneqartartut tamakkiisumik atorluarneqarnissaa kommuninit soqutigineqarpoq, taamaattumik soqutiginarpoq paasissallugu erngup nukinganik pilersuinermi aamma eqqakkanut ikuallaavinniit kissamik pilersuinermi nukik ataatsimut tamaat katillugu atorneqanngitsoortarpoq qanoq atsiginersoq paasissallugu ?

Kommuneqarfik Sermersuumi, Nuup illoqarfiani aallartittumik eqqakkanik immikkoortiterineq aallaqqaammut kommunip suliffeqafiutaani aallarnisarneqartoq tusarlugu iluarusunnaqaaq, taamaaliornikkut eqqakkanik suli pitsaaneruseqarpoq atorluanerunissaq anguneqartussaammat, taamaattumik Naalakkersuisut suliniummut tassunga peqataarusunnersut paasissallugu soqutiginarpoq ?

Ullut suliffiit qulit qaangiutinnginnerani akineqarnissara kissaatingaara.